

PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KEDUA , PENGGAL PERTAMA,
PARLIMEN KEEMPAT BELAS

PERTANYAAN : LISAN

TARIKH : 10 JULAI 2019 (RABU)

DARIPADA : PUAN VIVIAN WONG SHIR YEE [SANDAKAN]

SOALAN

Puan Vivian Wong Shir Yee [Sandakan] minta **PERDANA MENTERI** menyatakan apakah langkah yang akan dilaksanakan oleh Kerajaan untuk memperkenalkan "*Look East Policy*" ke dalam sistem negara kita bagi mempertingkatkan etika dan budaya kerja masyarakat Malaysia, terutamanya pemuda-pemudi yang akan menjamin masa depan negara.

JAWAPAN: YB TUAN MOHAMED HANIPA BIN MAIDIN
TIMBALAN MENTERI DI JPM

Tuan Yang di-Pertua,

1. Untuk makluman Ahli Yang Berhormat, selaras dengan hasrat negara untuk meningkatkan pembangunan modal insan dalam usaha menjadikan Malaysia sebuah negara maju, Penajaan JPA adalah bertujuan untuk menyediakan modal insan berkualiti kepada negara sama ada untuk lantikan dalam Perkhidmatan Awam mahupun untuk keperluan sektor-sektor lain dalam pembangunan negara.

2. Dasar Pandang ke Timur (DPT) yang telah diperkenalkan oleh YAB Perdana Menteri Tun Dr. Mahathir Mohamad sejak 1982, memberi fokus kepada pembentukan sumber tenaga manusia menerusi penerapan nilai-nilai dan etika kerja budaya Jepun dan Korea Selatan yang disesuaikan dengan budaya masyarakat Malaysia dalam usaha

mempertingkatkan pengetahuan dan kemahiran teknologi serta mempelajari sistem pengurusan organisasi bagi meningkatkan produktiviti menyumbang ke arah kemajuan negara.

3. Selepas Kerajaan Pakatan Harapan mengambil alih sejak Mei 2018 yang lalu, Kerajaan senantiasa dan akan terus memacu fasa baharu Dasar Pandang ke Timur ini. Lebih-lebih lagi, dengan cabaran baharu terutamanya agenda Revolusi Industri 4.0, *Digitalize Government and Workforce, Internet of Things (IoT)* dan *megatrend* terkini, terdapat keperluan yang tinggi bagi negara untuk terus mempelajari dan menerokai bidang-bidang baharu seperti Kecerdasan Buatan (AI), Kerajaan Digital, *Digital Economy*, IoT, *Emerging Automotive Trends*, *Big Data* dan *Cloud Computing* dari negara Jepun dan Korea Selatan yang mana kedua-dua negara tersebut telah mula memperkenalkan *Societal 5.0* dan *Government 3.0*.
4. Ini akan menambah nilai kepada sasaran awal DPT yang matlamatnya menghasilkan modal insan bukan sahaja sarat dengan pengetahuan teknologi malah memiliki asas budaya, nilai murni dan etika kerja yang positif dalam usaha membangunkan Malaysia ke arah negara berpendapatan tinggi.

Sekian, terima kasih.